



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 6

Yangia anidakangma : Tir Yimyim

tiryimyim@aolima

tir yimyim

TAPAK 7

## Mizoram indang Lok Sabha menden atema BJP-i Vanlalhumaka shim

## Taoba Maldives Tir-i Muizzu dang ojang tekong merangtsü ashi

VOL. XXI ISSUE NO. 163 (ADOK 163) DIMAPUR SANGTENNÜ (TUESDAY) METSÜREMI (MARCH) 26, 2024 ₹ 5.00

## PDA-i Lok Sabha elections atema nüboyimba maparen tenzükogo

Dimapur, March 25, 2024  
(TYO): Nagaland nung Peoples' Democratic Alliance (PDA)-i March 25, 2024 nü Lok Sabha election atema nüboyimba sentong tenzükogo.

"Naga nunger aginüba ama state sorkari Naga yimten latettsü atema tenangzükba nung noktaka lir. Iba ajanga nübortem longjemdakstsüogo aser yimten latettsüla" ta Nagaland Chief Minister Neiphiu Rio-i ashi.

"Tang ya MLA 60 den political party ajaki candidate pusemer. Nisung ka nem vote enoktsüba telongjem ajanga ken o ajak angatetteptsü sabang ka yanglutsü. ENPO, Naga tebilemtsü mesüra tanga onük süang telongjem ajanga ajak koptettsü. Anungji asenok ajaki pei pei teinyaktsü inyakdi aser ken o ajak angatetteptsü atema nübortem longjemi" ta CM Rio-i ashi.



"North east-i NDA sorkar pusemtsüla aser ibaji MP tem shimer yoktsüla. Iba ajanga parnok tali asentenshir linük asoshi aser talisa Northeast atema inyaktsü" ta pai ashi.

"PDA candidate-i takok angutsü kechiyong political party ajak aser Nagaland nung alirtem longjema lir. Asenoki tamakok angutsü ta ashitsü kuli kecha mali" ta BJP national

spokesperson & Nagaland in-charge Nalin Kohli-i ashi.

"PDA candidate-i otsütsüsa takok tulu angutsü atema nisung ajak dang mepishir. Nagaland nungi MP kati India nung takok tulutiba ngutetba sayutsüla. Asenok külemei yaritepra iba takokji angutsü" ta Kohli-isä ashi.

"Nagaland nung telongjem sorkar ka lir, political party ajak longjemer opposition maliba

sorkar ka lir. Yimtenren tangatetba aser tenangzükba balala süka onok nükjidong ka dang aser ibaji Nagaland nung alirtem tenzüksüba lir. Nagaland nung yimjung, terenlok aser azükuru alitsü atema onoki inyaker" ta Kohli-isä metedakstsü.

"Nagaland tejakleni aotsü atema Naga nunger longjemsüla. MLA ajak longjembä ya tashi sayuba dang masü saka

telongjem tamaitsü lir" ta PDA consensus candidate Dr Chumben Murry-i ashi.

"Ni takok ngura MLA tem aser Naga nunger asoshi jembitsü" ta Dr. Murry-isä ashi.

Iba sentong nung tanga political party nungi MLA temia Lok Sabha election nung PDA consensus candidate Dr. Chumben yaritsü tenangzükba agiogo.

## NPF candidate Zimik-i nomination süogo

Imphal, March 25, 2024  
(Agencies): Manipur nung Outer Lok Sabha constituency atema Naga People's Front (NPF) candidate Kachui Timothy Zimik-i nomination süogo.

Lok Sabha Elections 2024 nung II-Outer Manipur Parliamentary Constituency atema anogo ishika tejaklen NPF Central Working Committee (WC)-i Zimik tenüng mulunga agizuka liasü.

Zimik ya retired IRS ka lir aser pai Ministry of Finance (Revenue) nung Principal Chief Commissioner of Income Tax inyakogo.

Manipur nung Lok Sabha election ya shilem ana lemsar agitsü. Inner Manipur menden atema April 19 aser Outer Manipur atema April 26 nü elections agitsü.

Bharatiya Janata Party (BJP)-ia Outer Manipur Constituency nung NPF candidate yaritsü metedakstsüogo.

BJP National President J.P. Nadda-i tuyuba ama iba lemte

## APO-i Mao Council nem agütsüba Ultimatum meyipa agir

Dimapur, March 25, 2024  
(TYO): Angami Public Organization (APO) den Angami Youth Organization (AYO) lennirtemi ashishitep aketba Kezoltsa / Kozirii / Kozin area semdang aser iba sülen APO-i

Mao Council nem Ultimatum ka agütsüba meyipa agiogo.

Iba tesem nung taoba mapang Southern Angami Public Organization (SAPO) Resthouse raksatsüba Tenyimi Peoples' Organization (TPO)-i yanglushiogo aser akhi ama aliba

APO aser AYO-i tenük agi anguba osang metedakstsü.

Maneni, ashishitep aketba tesem nung Manipur Police Outpost ka amenokba tangalen belena aoba nguogo ta APO aser AYO-i ashi.

Teloktem tsüngda tangatetep kati arutsü atema mapang shitak nung teinyaktsü inyakba pelashishia agizüker aser iba asoshi Tenyimi Peoples' Organization (TPO) nem tashi agüja lir ta APO-i ashi.

APO-isä parnok kubok

aliba telok ajak dang iba ken o dak sendakba sangdong kecha magütsü tetuyuba agütsüogo.

Iba ken o atema angatetteptsü aser amalitep alitsü ayongzüker aser kati ka dak temulung lemteta telemtetba ka agitsü asoshi mapa tenzüksü. TPO-i iba ken o angatetteptsü ta tamang kaa APO-ia Ultimatum meyipa agir aser TPO dang tekaraba nung telok ajaki hai haura akatsüa lemetet ka agitsü mepishir ta APO-i metedakstsüogo.

## NPP-i NDPP candidate yaritsü: Conrad Sangma



March 25, 2024 nü NPP national president aser Meghalaya CM Conrad Sangma-i Nagaland chief minister Neiphiu Rio den ajurutepdang agiba noksa ka angur.

## Jaipur nung Naga nunger ka sur lia angu

Dimapur, March 25, 2024  
(Agencies): Jaipur nung arishi küm 22 tain Naga nunger ka sur lia angu. Iba nisung ya Phek jila nungi Vekuhuyi Rhakho ta jangjago.

Asür Vekuhuyi Rhakho indang mang Nagaland-i bener arudar aser pa tasodak Phek jila nung arentsü.

Asür Vekuhuyi ya süngzü agi alenseter lia angu aser pa sosetba osang ya anogo pezü lir ang parnoki angashi ta par kinunger kati ashi.

Asür Vekuhuyi'er kinungtemisa pa kinungtsü dak

tai tongloksü. Lai Vekuhuyi den majurutepdakstsü aser pa shirangba agi nisung shinga den jembitsü makoker ta ashi. Iba jagi kinungtemisa pa ya sosetba masü saka tepsetba liasü anungji temeten aginür ta metedakstsüogo.

Iba dak sendakba nung Phek Town Police Station nung ken o ka benokogo aser bushisüngdang ka tenzükogo.

Asür Vekuhuyi'er kinungtemisa pa ya sosetba masü saka tepsetba liasü anungji temeten aginür ta metedakstsüogo.

Meghalaya Chief Minister Conrad Sangma-i Nagaland Chief Minister Neiphiu Rio den ajurutepdang taruba Lok Sabha

election nung NDPP yaritsüba osang metedakja liasü.

NPP

ya NDA

nung teyariteper

ka lir

aser Nagaland nung Lok Sabha candidate Dr. Chumben Murry pusemtsü lemtetogo.

"Nagaland nungi NPP

lennirtem aser MLA tem den

külemei Nagaland chief minister

Neiphiu Rio den ajurutepa taruba

Lok Sabha election nung NDPP yaritsüba osang lemsatepogo" ta Conrad Sangma-i ashi.

"NDA

nung teyariteper

ka

ama NPP-i Nagaland Dr

Chumben Murry nung Lok Sabha candidate Dr Chumben Murry pusemtsü bangjemtepogo" ta Conrad Sangma-i ashi.

## Young Talented Artists Award sentong nung Angh La Ganesan aden



Shilpgram, Guwahati nung NEZCC ajanga March 24, 2024 nü "Young Talented Artists" award sentong ayongzükba nung Nagaland Angh La Ganesan aser pai tayongzükba o jembia liasü.

**Dimapur, Metsüremi/March 25 (TYO):** NEZCC ajanga Shilpgram, Guwahati nung March 24, 2024 nü "Young Talented Artists" award sentong ayongzükba nung Nagaland Angh La Ganesan aden.

Iba sentong nung jembidang, linük nung tashi tulutiba ya sobaliba nung keta lir asünung benjongbentsü ya kanga tongtipang lir, ta Angh-i ashi.

Northeast region nung sobaliba tabu balala, yimsüyimpong aser arts tsütsüa shilem tajung agiba ajanga alimai meteter. Folk dance, music, instruments aser theatre ajanga

asen ayak jangjaba kisüng masü saka iba ya ajanga asen otsü, tepele, timtem aser mangdang alima den lemsateper, ta pai ashi.

Anungji Ministry of Culture ajanga item rongsen ya jenjang temabai ajungkettsü nükjidong nung lanurtem ajungmesor. Performing arts balala nungi semet tajung aliba lanur 24-i alakteta semet sayuba benjontsü asoshi iba sentong ya ayongzük, ta pai ashi.

Nagaland Angh-i item lanur 24 nem tenüngsang agütsü aser semet angurtem aser kinungertem kisüng masü saka

Northeast region ajunga tejak tenteter, ta pai ashi.

Angh Ganesan-i semet angurtem dang pei mapa angateta sobaliba senmang wazüka ayutsü ayongzükli liasü.

"Asenok tejakleni aoba mapang maneni asen artists tem yariti, parnok semet sayutsü asoshi sapang agütsü aser parnoki asen sobaliba wazüka ayuba nung shilem tajung agiba pela agizükti," ta ashi.

"Asen nükjidong ya tesüiba indang benjontsü masü saka tarutsü jenjang sadema lapoka yutsütsü asoshi benjonti," ta pai ayongzükli liasü.

## Mizoram indang Lok Sabha menden atema BJP-i Vanlalhumaka shim



Vanlalhumaka

**Aizawl, Metsüremi/March 25 (Agencies):** Mizoram nungi Lok Sabha nung menden ka atema April 19 nü election agütsü aluba nung tokteptsü asoshi Bharatiya Janata Party (BJP) ajanga Deobarnü BJP Mizoram unit tir Vanlalhumaka shimogo.

Mizoram nung Lok Sabha menden ka dang lir, koba Scheduled Tribe atema wazüka lir aser tang temendak Mizo National Front (MNF) nungi Lok Sabha züngsem C. Lalrosanga-i tan election nung metokteptsü mulungtetogo.

Deobarnü BJP-i aruya aliba parliamentary election nung tokteptsü asoshi state 17 atema

candidate tenüngtem pongububa sangdongogo aser Mizoram indang Lok Sabha menden asoshi Vanlalhumaka ya lir.

Arishi küm 63 tain Vanlalhumaka ya 2014 küm BJP nung dena politics nung tetsüng ajemoka liasü.

Aji masüdang pa Mizoram assembly election nung 2008 küm Serlui constituency nungi independent candidate ama toktepa liasü, saka Congress nungi K. Lalrinthanga-i tsükdaktsü.

Pa ya 2016 nungi January 2020 nung party tir atema election magi tashi Mizoram BJP unit indang general secretary inyaka liasü.

ZPM teloki arishi küm 46 tain entrepreneur Richard Vanlalhumaka shima lir, shiba politics nung tasen aser MNF-i Mizoram nungi tang Rajya Sabha nung mena alisang arishi küm 54 tain K. Vanlalhumaka shima lir.

Congress-i retired Mizoram Police Service (MPS) officer aser taoba state home secretary arishi küm 64 tain Lalbiakzama shima lir aser People's Conference (PC) ajanga ajaki meteta aliba Mizo ken atener arishi küm 48 tain Rita Malsawmi shima lir.

Taoba mapang Congress nung alisang Lalhriatrenga Chhangte ya independent candidate ama tokteptsü, shibai 2019 Lok Sabha election nung tamakok ajurua liasü.

## Polling Personnel & Grade-IV/MTS training alitsü

**Dimapur, Metsüremi/March 25 (TYO):** Deputy Commissioner aser District Election Officer, Mokokchung ajanga sangdong ka nung 18th Lok Sabha atema General Election 2024 asoshi Polling Personnel aser Grade-IV/MTS ajunga atema 1st Phase Training ya March 27 & 28, 2024 anogo agitsü, ta metedaktsüo.

March 27, 2024 nü Presiding Officer & First Polling Officer (tetsür) atema training ya anepdang 9:30 ako nungi tenzüksü aser Presiding Officer & First Polling Officer (tebur) atema training ya anüngdang 12:00 ako nungi tenzüksü. Iba training ya Mayangnokcha GHSS, Mokokchung nung agitsü, ta sangdong ajanga ashi.

March 28, 2024 nü Second & Third Polling Officer (tetsür aser tebur) atema training ya Mayangnokcha GHSS Mokokchung nung anepdang 10:00 ako nungi tenzüksü aser Grade-IV & MTS atema training ya anüngdang 12:00 ako nungi Town Hall, Mokokchung nung alitsü. Election duty certificate aser election Duty ID Card angutsü atema polling personnel aser Grade-IV aser MTS ajaki training mapang EPIC Card/service ID card photocopy den passport ana agütsütsüla.

Maneni departmental Nodal Officers ajunga dang requisition süa aliba ketdangsür aser Grade-IV/MTS ajunga dang osang magütsütsüla, ta sangdong ajangasa ashi.

## Assamnungshishilemparkatepsetbasülenlongkakait

**Guwahati, Metsüremi/ashir:**

**March 25 (Agencies):** Shishilempar lanur ka tepsetba sülen Golahat, Assam nung nübertem longkak aita liasü.

Osang ajanga ashiba agi, Bokakhat kübok Kakochang nung longkak ya aita liasü.

Shishilempar lanur, Royal Ronghang ya Deobar aonung Naharjan Kakojan Road nung meita atar tepset ta ashir.

Karbi Anglong aser Golahat district tsüngta arütsü anasa mejangjaba nisungtemi Royal ya pa indang gari telung nung lia amak ta

Royal ya Bokakhat nungi par kidangi aiba mapang iba lendong ya ajuru ta ashir.

Pa indang tasümang ya Hombarnep azü agi yimbanger angu.

Pa tasümang ngutetba sülen yangji alirtemi nisung tepsetba anema longkak aita aibelener nem tapet temerenshi agüjang ta police nem takhangba agüja liasü.

Iba osang züluva mapang tashinung nisung kata pua mali aser police temi bushisüngdang tenzükogta ashir.

## Sikkimassembly&LokSabhaelectionatemaSDF aser SKM candidate tenüng sangdongogo

**Gangtok, Metsüremi/March 25 (Agencies):** Sikkim Democratic Front (SDF) ajanga Sikkim nung assembly menden 32 prong atema candidate tem tenüng sangdongogo.

aser Namchi Singithang A/c nungi Bimal Rai tokteptsü.

Maneni Sikkim nungi Lok Sabha menden ka atema election nung tokteptsü asoshi SDF-i PD Rai shimogo.

Kasa mapang Sikkim Krantikari Morcha (SKM) nungia state legislative elections atema candidate tem tenüng sangdongogo.

SKM nungi tokteptsüpur rongnung nübu tejangja rongnung TT Bhutia (Yuksum Tashiding A/c), Bhim Hang Limboo (Yangthang A/c), Sudesh Kumar Subba (Maneybomg Dentam A/c) aser Lok Nath Sharma (Geyzing-Burmiok A/c) nungertem alitsü.

Maneni Lok Sabha menden ka atema SKM candidate ama tokteptsü Indra Hang Subba shima lir.

Sikkim Chief Minister PS Tamang ya par Soren Chakung constituency nungi tokteptsü telemtetba agiogo.

Sikkim assembly menden 32 aser Lok Sabha menden ka tema election ya April 19, 2024 nü agitsü.



Thimpu, March 25, 2024: Bhutan Chuba kidang India Ato kilonser Narendra Modi Bhutan Chuba Jigme Khesar Namgyel Wangchuck (abelen) aser par kibong den tangokba noksa nung angur.

## AAP-i 'Save Democracy, Constitution' social media campaign tenzük

**New Delhi, March 25** Chief Minister Arvind Kejriwal jail nung puoka aliba noksa lir aser "Modi Ka Sabse Bada Dar Kejriwal" ta zülua lir.

Atishi-i, "Arvind Kejriwal tajungshiba ajanga linük tesem ajak atongtsü nükjidong nung onoki social media nung DP campaign ka tenzüker. Aam Aadmi Party lenirtem, MLA tem aser party nung inyaker ajaki DP melentsü," ta metetdaktsü.

Atishi-isä nüberem danga AAP indang social media DP campaign nungji shilem agiba ajanga linük nung democracy

DP noksa nungji Delhi aser temzung kümzükang, ta mepishi.

Enforcement Directorate-i Kejriwal apuba anema longkak aita Hombarnü AAP lenirtemi Holi benjung nung shilem magitsü telemtetba agia liasü.

AAP leniri X ajanga, "Holi ya benjung ka dang masü saka tajung agi tamajung koktetba temaitsü lir. Tanü Aam Aadmi Party lenirtemi iba temenen, taochi maket aser tim masüba mapatem anema rrar. Takümbö Aam Aadmi Party-i rong mamshitsü aser Holi mamongtsü telemtetba agiogo," ta metetdakja liasü.

ketdangsertemi la yaria liasü. Arrshi küm 33 tetsürlaji kanga mejungi yirur lia angu. Emergency services ajanga la kümzüksü merangyongamekümzükteti iba tesem nungji asü. Lar kinüngertem nem iba osangji metetdaktsüogo," ta metetdakja liasü.

Iba lendong atalokba tesem nung tenük kuli alirtem mesüra gari nung dashcam amshirtem dang Met Police den tongteprateptsü mepishia liasü.

Taoba mapang NITI Aayog nung CEO inyaksang, Amitabh Kant-i, "NITI Aayog nung Cheistha Kochhar-i #LIFE [Lifestyle for the Environment] programme atema kü den külemi inyaksema

Paisa, "La #Nudge unit nung liasü aser LSE nung behavioural science PhD agitsü atema London-i ao. London nung cycle nung senzüba mapang nung lendong ajurua la süogo. La kanga tekolok techira aser tasütait nisung ka liasü. Kanga keraa alima nungi pilaogo. Tesünep nung anisüngzükang," ta lemsatep.

Kochhar-i küm ana tashi National Behavioural Insights Unit of India nung Senior Advisor inyaka liasü. Yaküm April ita tashi la advisor inyakba sülen la kinüngbu software engineer, Prashant Gautam tena London-i oa liasü.

La tebui social media ajanga la lendong nung asüba osangji lemsatep.

Met Police-i sangdong ka ajanga, "London Ambulance Service nungi paramedics aser

## TMC nungi Mahua Moitra-i BJP candidate Amrita Roy den tokteptsü

**Kolkata, March 25** (Agencies): Taruba Lok Sabha election nung Trinamool Congress lenir, Mahua Moitra-i Bharatiya Janata Party nungi tang mezüng election nung tokteper, Amrita Roy den Krishnanagar Lok Sabha menden atema tokteptsü.

Amrita Roy ya tamarener kibong ka nungi lir.

BJP-i candidates list pongububa sangdongogo; iba list nung Kangana Ranaut aser Arun Govil nunger ama celebrities aika densema lir.

Krishnanagar menden nung tokteptsü atema BJP-i shimba candidate Amrita Roy ya tamarener kibong nungi asüba ajanga la dang 'Rajmata' taka ajar.

Takümbö Aam Aadmi Party-i rong mamshitsü aser Holi mamongtsü telemtetba agiogo," ta metetdakja liasü.

2009 küm nungi Krishnanagar ya Trinamool Congress menden lir. Iba jakdang (1971-1999) Krishnanagar menden ya CPIM-i atsüngä liasü.

## EAM Jaishankar aser Singapore Ato kilonser Lee na senden amen



March 25, 2024 nü Singapore nung India External Affairs Minister, S. Jaishankar aser Singapore Minister for Foreign Affairs, Vivian Balakrishnan na senden ka nung tangokba noksa nung angur.

**Singapore, March 25** Teo Chee Hean na den-a senden amen.

Paisa finance minister Lawrence Wong-a ajuru.

"Singapore FM @VivianBala ajuruogo. Linük ana tesüngda amalitep tsütsü tesendaktep asadangogo. Taruba ISMR senden atema terenemshiba jenjang reprangshiogo. Linük ana tsüngda tesendaktep küm 60 ajungba dak sendakba nung o lemtepogo," ta paisa metetdaktsü.

Trade and Industry Minister Gan Kim Yong den senden amenba sülen Jaishankar-i X ajanga,

"Shishilembaba, semiconductors, space, green energy, supply chains aser defence onüktem nung o lemtepogo. Item onük ya taruba India-Singapore Ministerial Roundtable nunga jembitsü yongyaa atar," ta metetdaktsü.

National security minister Teo Chee Hean den senden amenba sülen Jaishankar-i, "Singapore Senior Minister aser Coordinating Minister for National Security Teo Chee Hean den senden menogo. India nung temelenshi onüktem atema o lemtepba den külemi linük ana tsüngda tesendaktep atema parnoki benokba moangka balala atema jembiogo. Regional aser international onüktem nunga o lemtepogo," ta metetdaktsü.

Foreign minister Balakrishnan ajuruba dak alia Jaishankar-i trade & industry minister Gan Kim Yong aser Coordinating minister for National Security,



March 25, 2024 nü Srinagar nung Sashastra Seema Bal (SSB) sepaitem Holi benjung amongdang tangokba noksa nung angur.



# TIR YIMYIM

## YIMOBILEM (EDITORIAL)

DIMAPUR SANGTENNÜ, MARCH (METSÜREMI) 26, 2024

### Naga nungeria CAA anema ola adoktsüla

- P Tiamongba Aier

**K**erala nung Left Democratic Front (LDF)-i Citizenship (Amendment) Act, 2019 anema lungkak aitba maparen ka tenzükogo aser March 24, 2024 Deobarnü Chief Minister Pinarayi Vijayan-i tanü India tensa ya Hitler mapang Yihuda nunger reshikangshiba tensa den mesüktepa aliba indang jembiogo. Hitler aser par Nazi züngsemtemi Yihuda nunger reshikangshiba aser parnok tsükchir ama züngshiba ama RSS aser Sangh Parivar-ia nübo agi tangar memenepertem aser talisa Muslim nunger yamaji züngshir aser iba tangatetba nung CAA ya benok ta Kerala CM Vijayan-isa metedaktsüogo. RSS-i India ya religious State ka kümdaktsütsü agenda nung CAA ya shilem ka lir aser Centre sorkari Constitution alema iba Act mapa tenzükogo ta paisa shiogo. CM Pinarayi Vijayan-isa Kerala nung CAA aser National Population Register (NPR) mebenoktsü shiogo. Meghalaya nunga kaketshir teloktemi anir CAA anema noktaker aser March 25, 2024 Hombarnü Mawkyrwat nung lungkak aitba sentong tulu ka ayonga agiogo. March 25, 2024 nü Khasi Students' Union (KSU), Federation of Khasi-Jaintia and Garo People (FKJGP) aser Synjuk Ki Seng Samla Shnong (SSSS) teloktemi anir CAA lungkak aitogo. Maneni, Assam nunga All Assam Students' Union (AASU)-i anir telok aikati CAA magizüker aser Centre sorkari CAA mapa tenzükba osang metedaktsüba sülen nungi lungkak aityonga arudar. CAA ajanga March 24, 2024 nü Dibrugarh nung Rajor Dal president & Sivasagar MLA Akhil Gogoi-i Assam Jatiya Parishad (AJP) candidate Lurinjyoti Gogoi atema nübo yimtsüogo. Assam nung CAA anema noktaka aruba nung Akhil Gogoi aser Lurinjyoti Gogoi na ya tongti lennirtem lir aser iba jagidang Lok Sabha elections atema Akhil-i Lurinjyoti pusema nüboimtsür. Northeast nung CAA mebenokdaktsütsü atema North East Students Organisation (NESO)-i anir kaketshir teloktemi lungkak aitba sentongtem agir aser Nagaland nunga Naga Students Federation (NSF)-i shilem agia arur. Ajisüaka, NSF dak alaka Nagaland state sorkar mesüra kin hoho mesüra civil society group temi CAA anema ola adokba mesüra tebilemtsü abenba ken o kecha maliba angudang ratar. Atangji iba ozüng ajanga lisopurtem asoshi tebilemtsü bentsü arutsü aser Nagaland ama lisopur aliba state kati kanga arokaroka shisadangtsü nüngdaker. Hao, Inner-Line Permit amshiba state tem-Arunachal Pradesh, Mizoram, Nagaland o Manipur den ano Constitution of India nung Sixth Schedule kubok adenba district tem nung CAA mebenoktsü ta Centre sorkari jangjajangja shiogo saka mebenoka tebilemtsü bentsü arutsü ana nung dang lir. Asen kidanger Assam state nung Sixth Schedule kubok district 8 nung dang CAA mebenoktsü saka tanüngba district tem nungbo benshitsü anungji ozüng alema arurtem alitsüsa aser parnok Assam nung arua jenoker India senso akümber sülen Nagaland nung teti atema alitsü arura asenoki menokdangtetsü. Nagaland nung tanga district temji khen toktsüdi saka Dimapur, Niuland aser Chumoukedima district nung reprangdangra non-locals nütsüng yongsük onsara kümogo aser parnokji talisa Illegal Bangladeshi Immigrants (IBIs) lir. Tanü asenok zübäzulemba agi mesüra mekümdangba agi tarutsü nung Tripura nung lisopurtem tia majrudaktsünura CAA anema ya ola adoktsüla aser Nagaland state nung iba CAA mapa meinyakaka timtem majorutsüsa state sorkari Indian Constitution nung ajemdaker mesüra kin hohotemi Naga customary law nung ajemdaker temzüng-ozüng kar tang nungi lateta ayu junger.

# OLEMSABANG

## AYONGZÜKER

~ T.Lima Jamir, Ungma Aonglenden, Artang Ward

Tamasa asen Nagaland nung aliba amangbapur dang masü alima tesem tesem nung Khristan kwi lir ajak dangi Easter Sunday salem abener.

Shirnok kibongbo aküm saka tzü nung baptiba member mali aser sentep ki mengutangi lir, parnokji Tanüla tekümtet mali asünung parnok tasünü asü pila sentep maliang tajungba asütsü südi. Iba lima nungbo pei tepok chiyongtsü asoshi moatsütsüa akok, saka par taküm aser kibongji Tsüngremi tenük zünga reprangtar ta bilemangma. Iba lima yabo tepenja aser temeneri sünga aliba lima asünung tajungera aser tamajungertema ajak timtem aser tekangshi ajurutsübsa kechiyong asenok alima nung aliba meimchirtemi ya tashi dang inyaka arur. Shir kin-I Khristanpur rishikangshir aser mezüngmeshir, parnoki kotak yimli mangutsü, asenokbo shitakba taküm Tsüngrem amanger aser külemer asünung küm shia Par chir sur shia aruba bilemteta amonger, asen tenük agi menguaka paibo alima awajema reprangtar ta bilemangmang. Tejen Lai putu mapang nungi Tasen Lai nung shia aliba ajak tanü tashi nütsüng nüburtemi Tsüngrem anema aser Par chir Yisu tashi mezüngmeshia atala rishikangshia aruba meimchirtemji asenok lir. Khrista nung temeim amangbapurtem asenok dang ken ajanga yamai ashir:

- |  |  |
|--|--|
| <ol style="list-style-type: none"> <li>1. Na yisu tsüngdanger asü<br/>Yisu zü nung shidokogoma<br/>Tang pa temeim imlar asü<br/>Yisu zü nung shitokogoma</li> </ol> <p><b>Lepiazü:</b></p> <p>Pa zü nung shir shitok,<br/>nü menen ajak shitoker ma<br/>Nü süpütsü temesüng kümer asü?<br/>Yisu zü nung shitokogoma.</p> <ol style="list-style-type: none"> <li>2. Yisu tsüngdang na teti alir asü,<br/>Yisu zü nung shitokogoma<br/>Yisu den na teti tesünep lir ma<br/>Yisu zü nung shitokogoma.</li> <li>3. Temenen subotsü ajak entoker<br/>Yisu zü agi shitokang....</li> </ol> | <ol style="list-style-type: none"> <li>1. Menen shitoktsütsü kechi<br/>Yisu zü agi shitoktet<br/>Kümzütsü kechi agi kümzüktet</li> <li>2. Kü tatok ni angur ibai Yisu azü agi dang<br/>Ni meshitetsü mepir<br/>Ibai Yisu azü agi tang</li> <li>3. Kechai menen malangtet<br/>Yisu azü agi tang alangtet<br/>Tajung inyakyong masü<br/>Yisu azü agi alangtet</li> <li>4. Kü imla sünep ajak<br/>Ibai Yisu agi tang<br/>Kü temeshiba ajak<br/>Ibai Yisu agi tang.</li> </ol> |
|--|--|

### Khristan-tem atema tongpang rara tasen ka tenzükogo

~ L.Kika Pongener.

*(Yashi adok nungi...)*

Surabangla, LGBTQ+ telokji arogoi-a agizüksü asü magizüksü...??? Aser laishiba-ia koda ashir...????ta asenok ajaki khen kanga junga shisadangdi aser laishiba nunga iba atema ya koma-ka shia lir...Itemji khen bushidangdi...."Aser nisung jagi ashi, ibai tang kü teret nungi teret aser kü shi nungi shi ; la dang tetsür ta ajatsü, kechiaser la tebur nungi agitet. Anungji nisungi pei tebu aser pei tetsü toktsür pei kinungtsü den sentepa alitsü, aser tena shi ka dang alitsü" (Lipok-2:23). "Iba atema tebur pei tebu aser tetsü toktsüsü aser pei kinungtsü den temulong toka alitsü. aser tena prungla shi ka akümtsü" (Efesa-5:31). Iba laishiba tekong anapprungla nungjagi asenoki tejangja angateter...Teburi pei tebu aser pei tetsü toktsür pei kinungtsü (Tetsür) den temulong toka alitsü aser tena shi ka dang akümtsü...ta dang shia angur. Tebur o tebur na aser tetsür o tetsür na shi ka kuma alitsüba indang laishiba nung kecha shia mali.

Ano laishiba nungji züngra..."Nai tetsür den ama tebur den temedem. Ibai tesempatsü lir" (Levi-18:22). "Tebur kari tetsür den ama tebur den medemra, tenapprunglai tesempatsü benshiogo" (Levi-20:13). Ano tasen lai nunga züngra..."Kechiyung tetsürtemi yimya benshiba kazüba toktsür, koba yimya masü aji parnok rongnung inyak. Aser küsaji teburtem-ia tetsür den kazüba yimya toktsür kati ka den japujaritsü tenzük. Aser parnok mashikoshi yimya benshiba dalang pei dak atalok" (Rom-1:26-27).

Ano tebur agi tetsür akümba aser tetsür agi tebur akümba indang laishibai koda ashir...??? "Tetsür kati tebur meyong mesobutsüla, mesura tebur-ia tetsür suoshi mesobutsüla. Kechiyong shibaisa item mapa inyakdir, Kibuba ne Tsüngrem madang tesempatsü lir" (T.Künem-22:5). "Tebur kou (Hair) talang ketra, pa asoshi maksu lir, aji yimya agi nenoki memetet no ? Saka tetsür kou talang ketra, aji la asoshi sentsüwangshi lir. Kechiyong la kou-ji temeibangtsü asoshi la nem agütsü" (1 Korint-11:14-15). Aji oda, item laishiba tekong ajanga tebur agi tetsür akümtsü aser tetsür agi tebur akümtsü memelar sudi...ta küli angur. Anungji LGBTQ+ telokji arogoi agizüksü asü magizüksü (?)...aji kecha ratatsü malia ta bilemer.

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazüngeri angateta agitsü mepishir**

# Israel-i Palm Sunday nü Palestine nunger Khristantem nokdang



March 24, 2024 nü Yirusalem nung Palm Sunday sentong dak sendakba nung Khristantem süngejogong amer Olive tenem nungi Damascus Gate tashi aodang tangokba noksa nung angur.

**March 25, 2024:** Palm Sunday (March 24) nü Israel-i West Bank nungi Palestine nunger Khristantem meyirjang aika Yirusalem yimti tejenba telungi maitdaktsüi nokdang; Israel nunger sepaitemi Yirusalem temeket aser Yirusalem yimti tejenba temeket ajak nokdanger Palestine nunger Khristantem nokdang.

Amongnū Latin Patriarch of Jerusalem, Cardinal Pierbattista Pizzaballa leniba nung Yirusalem yimti tejenba nung aliba Holy Sepulchre Tenla kidang Palm Sunday tekülem sentong agia liasü. Iba

sentong nungji putirtem, monks, nun tem aser tamangertem aden.

Israel ketdangsertemi Palestine nunger Muslim aser Khristantem dang Yirusalem yimti telungi aittsu atema aser Al-Aqsa Mosque den Holy Sepulchre Tenla kisangi aotsü atema temelaba meshiang, ta jelia metedtakja liasü.

Tang Israel o Gaza na tsüngejogong aitatem aser tezüngzütep ka kübok ni kuli agütsütsü. Iba tetezü ni kija atema dang masü saka ozü chirnurtem aser kibong züngsemtem taküm atema tebilemtsü katsür," ta paisa metedtaktsüi.

Easter anogo nung bomb amshia amakba ken o dak sendakba nung tawa United Nations Human Rights Commission (UNHRC) matsüngdang ken o benoker Khristan putir Rohan Silva-i, "Taoba mapang Tir tangsa aputsüla aser asüngdangyatsüla, kechiyong ozüng alema inyakba mapatem miimshibaji ozüng alema lir," ta ashi.

Khristan MP, Kawinda Jayawardena-ia, Sirisena-i küm pongu jungnúa osang mimshibaji ozüng alema lir, ta shia CID nem tashishiba ken o agütsüogo.

2019 küm Easter Sunday anogo, April 19 nü kiralongr telok National Thowheed Jamath nungi züngsem 9-i Tenla ki asem den hotel asem amakdang Khristantem teimba ser nisung 269 astü.

Iba tatalokba sülen Colombo nung Cardinal, Malcolm Ranjith densema Arogo lenirtem aser meimchir temeden atema inyakba telok balalai taoba mapang Tir Gotabaya Rajapaksa aser tang teinyakdak

tesem balala nungi Khristantem ishika dang arua liasü kechiyong Gaza nung rara ajanga airlines aikati tayimtsü service anena lir aser Jordan nungi bendangertem Israel telungi aittsu memelar.

Jerusalem, Bethlehem, Jericho aser Gaza nung Western calendar amshiba Arogotemi March 24 nü Palm Sunday mongogo.

Bethlehem nunga Latin Church of Saint Catherine nung Palm Sunday tekülem sentong agi aser

Gaza City nung Holy Family Latin Church nung Palm Sunday sentong agi.

## ANOGO ABEN TSÜNGREM DEN

### Tanel ari arurtem

"Aniseta alir dang o agi ... koda jembitsü ... temeli agüja lir." (Isa. 50: 4a)

Khristan mapa nung tesademtiba mapa wadangji tanel ari aruba mapa ya lir. Koba Khristani aji inyaktsü makoker, koba meta tesütep masür, aser kechi mapang mesadermer?

Kar tanel ari arutettsü asoshi asenok dangi tangarji mela mela arutetba asütsüla. Tanel ari arur ka menürem tejak adentsüla. Pai osang tajung bener aor masüna? Tanelatem asoshi khuret akabaji pai tejak mekümer mesayutsüla, saka anemsü masütsüla. "Onük tajung ka agi kü mulungjang moshia lir. Chuba atema ni kechi ken mejemer; Kü temeli kara kara-a zülur kolem ama lir" (T. Ken 45:1). Ibai tanel ari aruba noksa ka lir.

Tanel ari aruba mapaji azünga alidang inyakba mapa ka masü. Ibai mapang ajak nung kuli asütsüba mapa ka lir (2 Tim 4:2). Aluyimer ama tanel ari arurtem metsü proker aluruwa asoshi aremzüka atatsüla (Yakob 5:7). Tanel ari arur nisung kajango purtem ama zütsük tzü nung ondaktsür aremzüka atatsüla. Taremzuk aser tenendakji tanel ari arur jakla asütsüla. Merangdangba aika nung takok mangutsüa akok, saka mejashitsula. Arogo nung Sannükeri sentepi arurtem dang masü, marur aser samaba santemji kümmdanga bushitsüla. Pai aritepa medoktsütsüla. Nisung tsüngdang kechi tamakoktsü aji Tsüngrem tsüngdangbo takoktsü lir.

## Syro-Malabar Arogoi kanga shisa kaa vote agütsütsü ajungshir

**March 25, 2024:** India nung General election agütsü mapang ana nung lia Eastern rite Syro-Malabar Arogo nung tongti leniri nüburtem dang minorities temeden pusemba aser linük secular pusemba party tem nem vote agüjang, ta mepishi.

March 22, 2024 nü Kerala state nung amenoka aliba Syro-Malabar Arogo nung tongti putir, Raphael Thattil-i, Hindu pusemba ruling party-i India ya Hindu linük ka kümzdaktsütsü meranger, ta tai tongloktsü.

March 22 nü Kottayam jila nung osangbenertem den jembidang Thattil-i, India nung Khristantem anema inyakba tatalokbatem kanga bulua akumba ya tejashitsüka lir, ta metedtaktsüi.

Arrshi küm 67, Thattil-i, "Linük nung Khristantem anema inyakba tatalokbatem kanga bulua akumba ya

tejashitsüka lir, kechiyong linük Malabar Church nung züngsem million 5 dak tema lir, aser India nunga iba Arogo headquarters Kerala kübok Kottayam jila nung lir.

March 25 nü osangbenertem den jembidang Antony Vadakkekara-ia, "Linük nung secular aser democracy jenjang tamajungba akumba atema onoki tebilemtsü akar," ta ashi.

Election Commission of India-i Lok Sabha nung MP 543 shimtetsü atema April 19 nungi tenzüka election shilem tenet lemsar agütsü sangdongogo.

March 22 nü Raphael Thattil-i Ato kilonser Narendra Modi dang tamalen Khristan putirtem den senden ka amendang Khristantem anema inyakertem nem temerenshi agütsütsü ta nai nangzükba ama inyaktsüla, ta nenshia metedtaktsüogo.

India aser bendanglen Syro-

**AO OSHI ANGAZÜKDAK:**  
**TANÜ ANGAZÜKTSÜBA OJANG**


Südikor


(adv) mejangjai jembiba ( may be)

· Asenoki tajung bilemba ama südikor ajak jungadoktsü.

Süen

(n) sü entaka ayudak (clothesline)

\* Süen nung sü putaka ayur.

**OLONG PAITEP # 6738****TIPLÉN**

- |                       |       |                             |       |
|-----------------------|-------|-----------------------------|-------|
| 1. Balaka             | - (5) | 2. Hai sur inyak            | - (4) |
| 6. Aika shirangba     | - (4) | 3. Aor tenüng ka            | - (6) |
| 7. Tar tatsü          | - (6) | 4. Ali telungi talangka lur | - (5) |
| 9. Nenü'er jabaso     | - (4) | 5. Tebang kenyongi mazuoker | - (4) |
| 10. Sen latettsüba    | - (7) | 8. Ken atema anenzükertem   | - (5) |
| 11. Tangar kübok alir | - (4) | 9. Toktepa noktak           | - (5) |
| 14. Lon nung inokba   | - (6) | 10. Sen                     | - (6) |
| 15. Tzü ayimdark      | - (4) | 11. Benjong agi             | - (5) |
| 16. Ajok              | - (5) | 12. Telung nung rizunga ayu | - (4) |
|                       |       | 13. Tebang nung enok        | - (4) |

**OLONG PAITEP # 6737 TELANGZÜBA****TIPLÉN :**

- |                                  |                                 |
|----------------------------------|---------------------------------|
| 1. Aben, 4. Artsü, 7. Lisem,     | 1. Aruli, 3. Balala, 5. Suwar,  |
| 8. Liwa, 9. Sarasadem, 12. Aket, | 6. Belem, 9. Sujak, 10. Aonung, |
| 14. Mangu, 15. Anünü, 16. Ango.  | 11. Dokan, 13. Tinu.            |

**LANGTSÜNGLEN**

- |                             |       |
|-----------------------------|-------|
| 2. Hai sur inyak            | - (4) |
| 3. Aor tenüng ka            | - (6) |
| 4. Ali telungi talangka lur | - (5) |
| 5. Tebang kenyongi mazuoker | - (4) |
| 8. Ken atema anenzükertem   | - (5) |
| 9. Toktepa noktak           | - (5) |
| 10. Sen                     | - (6) |
| 11. Benjong agi             | - (5) |
| 12. Telung nung rizunga ayu | - (4) |
| 13. Tebang nung enok        | - (4) |

**NAI-A YA METETTER MA****Tschoi T - Outstanding Sportswoman**

3rd North East Games 2024 nung Naga tsür Tschoi T-i medal 6 ngutetba atema "Outstanding Sportswoman" naroküm nguteta liasü.

Tschoi-i 5000 Meters, 10,000 Meters, Mixed 4x400 Relay aser Women's Cross Country Team Event nung gold medal 4 angu. Laisa 4x400 Relay aser Cross Country Individual nung Silver Medal 2 nguteta liasü.

Tschoi ya Indo-Myanmar arrtsü anasa Noklak district nung lir.

**MPP candidate Rajkumar Somendro Singh-i nomination süogo**

**Imphal, March 25, 2024**

**(Agencies):** Manipur People's Party (MPP) candidate kati Mongulbarnü 1-Inner Manipur Parliamentary Constituency nung Returning Officer mesüra Assistant Returning Officer tsüngdang nomination papers agütsüla ta March 20, 2024 nü Election Notice ka agütsiogo.

March 27, 2024 matongdang 1-Inner Manipur Parliamentary Constituency nung Returning Officer mesüra Assistant Returning Officer tsüngdang nomination papers agütsüla ta March 20, 2024 nü Election Notice ka agütsiogo.

Manipur unit nunga vice president inyakogo.

Thounaojam Maheshwar-i ashi.

Taoba assembly election nung Thounaojam Maheshwar-i RPI (A) ticket amer Keishamthong assembly constituency nungi toktep saka tamakok angu.

Iba constituency atema Congress-i Dr A Bimol Akojam nem ticket agütsügo. Dr Akojam ya School of Social Sciences, Jawaharlal Nehru University, New Delhi nung taoba Associate Professor ka lir.

Republican Party of India (Athawale)-ia Inner Manipur Parliamentary Constituency atema candidate ka shimba osang metedaktsügo.

RPI (Athawale) yagi BJP-i aniba National Democratic Alliance (NDA) nung yariteper.

Kaiku-isa Lok Janshakti Party, "Inner Manipur Lok Sabha

**Meghalaya nung kaketshir teloktemi CAA anema lungkak ait**

**Shillong, March 25, 2024**

**(Agencies):** Meghalaya nung kaketshir teloktemi Mawkyrwan nung Citizenship Amendment Act (CAA) anema lungkak aitba sentong tulu ka agiogo.

Khasi Students' Union (KSU), Federation of Khasi-Jaintia and Garo People (FKJGP) aser Synjuk Ki Seng Samla Shnong (SSSS) dena kaketshir telok balalai CAA mapa tenzüksüba anema lungkak ait.

CAAs ajanga Meghalaya nung lisopurtem asoshi lendong bentsür arutsü akok. Citizenship Amendment Rules, 2024 nung District Level Committees ajanga Bangladesh, Pakistan aser Afghanistan nungi aruba non-Muslim nunger nem India senso agütsülateta aliba magiziiker ta kaketshirtemi ashir.

"Meghalaya nung lisopurtem kümzüka ayutsü atema Inner Line Permit (ILP) system

tenzüksüla" ta KSU South West Khasi Hills district unit Forwardman Nongrem-i ashi.

ILP ajanga lisopurtem kümzüka ayutsü aser yimtsüng nung ketdangsürtemia pei pei telongtet nung bendangertem aruba mita noktangtsüla, ta Forwardman Nongrem-i ashi.

Dorbar Shnong ta ajaba village councils-i bendangertem aruba azüoksüla, ta kaketshirtemi metedaktsü.

**ZPM-i April 1 nungi Lok Sabha nüboyimba maparen tenzüksü**

**Aizawl, March 25, 2024**

**(Agencies):** Mizoram nung Lok Sabha elections atema ruling party Zoram People's Movement (ZPM)-i April 1 nungi nüboyimba maparen tenzüksü.

ZPM ya 2017 küm party tilala ishika longjemer tentet aser küm ana sülen Election Commission nung register asü. Yaküm Mizoram assembly election nung parnoki takok ngua sorkar akum aser taruba Lok Sabha election atema Richard Vanlalhmangaiha Lalbiakzama shima lir.



Assam Rifles aser Mizoram police-i March 22, 2024 nü Indo-Myanmar arrtsülen Myanmar nunger ka apuba sülen agiba noksa angur. Osang tejangja ka angazükba sülen Assam Rifles Search Battalion aser Zokawhthar Police Department külem telok katì mita aodang prangpong-injang aika ngutet. Parnoki M4 Assault Rifle ka den magazine, German Pistol den magazine, double barrel rifles 2, single barrel rifles 2, 5.56 mm 20 rounds, 9 mm 6 rounds aser helmets 2 angu.

# Moscow concert amaker dak kanga sashia züka merenshi



Moscow kubok Crocus City Hall kima asürtem atema memorial yangluu alidang nüburtem adenshia aliba noksa ka yangi angur.

**Moscow, Metsüremi/March 25 (Agencies):** Russia yimtiba Moscow tezülen concert ka nung nisung aika khasetba atema tai tonglokja alir nisung pezü anema kiralongra mapa inyakba ken o benokja lir aser okadaki arudang kanga sashia züka merenshiba ajitet.

Küm 20 shi tsüngta Russia nung azüdokshi lendong tulutiba atalokba atema anogo ka mang yima linük nung nisan atszüker amungba mapang Deobarnü menur ken o ya benoka liasü.

ISIL (ISIS) ajanga tenüng agia aliba lendong nung tanur asem densema nisung 137 asü. Kasa lendong nung nisung 182 yiru aser item rongnung nisung 40 kangasa sashia yirur lir ta health ketcangsür temi ashir.

Moscow indang Basmanni District Court ajanga iba lendong agütsüba atema temulung melemi alir par pezü ya arishi küm 32 tain Dalerdzhon Mirzoyev, arishi küm 30 tain Saidakrami Rachabalizoda, arishi küm 25 tain Shamsidin Fariduni aser arishi küm 19 tain Mukhammad Sobir Faizov ta

jangjaogo.

Nisung pezüprong ya Tajikistan senso lir aser parnok teloki kiralongra mapa inyakba ajanga dangartem asü ta ken o benoka lir. Iba aibelen asoshi temerenshi tepuokdaki taküm tepiyong ayutsü.

Parnok ajak May 22 tashi pre-trial custody nung alitsü totuyuba agüja lir.

Mirzoyev aser Rachabalizoda nati iba lendong agütsüba nangzükogo ta court ketcangsür temi osangbener dang ashi.

Security services temi asüngdangyaba mapang parnok ya reshikangshia amshi ta Russian media ajanga ashir aser mejangja süaka video kar prokshiba nunga temulung melemi alirtem asüngdangyaba indang prokshiba liasü.

Court nung Mirzoyev, Rachabalizoda aser Fariduni nunger tejak waker aliba nguogo aser Faizov ya mozuki ka nungi wheelchair nung anir aru aser ken o jembi tepiyong tenük shibanger mena liasü. Court nun glia doctor temi pa anepalu liasü, kong pa mozuki

indang süoshi agir liasü aser temang nung zübu aika liasü.

Rachabalizoda ya tenarong alepbanger liasü.

Asüngdangyaba mapang temulung melemi alir ka tenarong rangdoktsü ta Russian media ajanga Honibarnü ashi.

Tir Vladimir Putin, shibai iba kiralongra mapa inyaker merenshistsü ta nangzükali, paia nisung pezü ya Ukraine leni jena aotsü merangba mapang apu ta ashi. Kyiv-ibo iba lendong den tesendaktep kecha mali ta shiogo. ISIL-i tenüng agiba atema Putin-i yimjak nung kecha shia mali. Paisa ano nisung tenet pua lir ta shiogo.

Kolen nungi südir süang, shiba südir süang, iba lendong agütsüba dak Russia-i tenük yoktsü, ta Russia indang Security Council nung deputy chairman Dmitry Medvedev-i ashi.

Tasüba melen tasüba agi merenshistsü nüngdaker ta pai taoba mapanga jembia arur aser legislator kari tasüba temerenshi tanaben amshitsü indang jembi tenzükogo.

(Maneni tapak 8 nung...)

## Taoba Maldives Tir-i Muizzu dang ojang tekong merangtsü ashi

**Malé, Metsüremi/March 25 (Agencies):** India den tesendaktep mejungi akumba mapang ka nung taoba Maldives Tir Ibrahim Mohamed Solih-i pa melener Mohamed Muizzu dang ojang dang tekong merangtsü shiogo. Solih-isa, Maldives rongsenketzung nung timtem adoker aliba mapang Muizzu dang India den tesendaktep yanglushitsü mepeshia metedaksüogo.

"Ajisüaka asen kidangeri asenok yaritsü ta ni tamang akar. Asenok kangabo tekong memerangai sensaksemtü atema merangtsüla. Asenok yaritetsüp aika lir. Ajisüaka Muizzu-i hai haura makaner. Sorkari tang ang tensa angateta arur ama bilemer," ta Solih-i ashiba local media sangdong balala ajanga metedaksü.

Taoba Tir-i ashiba agi, MDP sorkari amenoker aliba project

tem amenokshia sorkari nüburtem ashioktsü.

Muizzu, shiba China pusemer ka ama zungshir, pai India dang Maldives indang sentsüh atema anisungzuk agütsütsü asüngdangba sülen tang Ibrahim Mohamed Solih-i iba olen ya lemsatepogo.

Male nung sentong ka nung o jembiba mapang taoba Tir Solih-i ashiba agi, China dang maldives sentsüh MRV billion 18 lir ajisüaka India dangbo MRV billion 8 dang lir, koba küm 25 tsüngda aotsü atema lemteter lir. Paisa, linük rongsenketzung nung timtem adokba ya India dang loan agiba ajanga masü ta ashi.

Mohamed Muizzu-i election atema nüboyimba mapang aser Tir akumba sülen India aitsüogo aser iba ajanga pai office mapa agizükba November ita nungi linük ana

tsüngda tesendaktep mejungi kümogo. Maneni Ato Kilonser Narendra Modi-i

Lakshadweep' ajungketja jembiba atema Maldives nunger minister temi Modi aitsüba sülen ano linük ana tsüngda tesendaktep tamajungba kümshio.

Maldives Tir yagi par linük nung aviation sabang asem achaayanga aliba India nunger sepi 88 May 10 nü tashi nung linük toktsür aotsü tetuyuba agütsüogo. India nunger sepi 26 bo iba linük toktsürogo aser parnok ya civilian agi melenogo.

Ajisüaka tawa interview ka nung Muizzu-i, linük ana tsüngda tesendaktep raksatsüsa pai o kecha jembia mali, mesüra jenjang agia mali ta shiogo. India ya maneni Maldives atema tongtibang linük ka lir, ta paisa shisem.

## OFFICE OF THE MANGMETONG YIMPANG PONGENER KIDONG TELONGJEM KOHIMA

KOHIMA :797001, NAGALAND

### TENÜNGSANG ASER TETUSHI AGÜTSÜR

Mr Moachet Pongener, S/o. Dr.Imtiwabang Pongener & Mrs Thungchanbeni Kithan, NSSB 2023 tatiang nung LDA cum computer Assistant (Directorate), Directorate of Sericulture nung takok tajung ngutetba asoshi Mangmetong Yimpang Pongener Kidong Telongjem, Kohima-i tenüngsang tetushi agütsür. Tsüngremi nü mapa nung maneni moajangma.

Sd/-  
CHUBAMEREN PONGENER  
President, MYPKTK



J AONGCHANG PONGENER  
General Secretary, MYPKTK

Office of the  
DIMAPUR MOLUNGYIMSEN SENSO TELONGJEM  
Dimapur Nagaland

### METETDAKTSÜR

1. Molungyimsen senso/sensotsür shirnoksa Dimapur nung arua govt/private mapa nung inyaka alir mesüra anetayanger aser shibelener kar Dimapur Molungyimsen Senso Telongjem nung registration magi lira April 30, 2024 anogo matongdangsa registration asütsü metedaktsür.
2. Kaketreju/Training institute nung alir kar hostel mesüra para ki (rent house) nung lira, pa/lai kinunger khunentong (guardian) tejangja bener arua DMST Guardianship form meshia fill up sur temalen agüja aliba anogo matongdang DMST züngsem akümtsüla.
3. Temalen shia aliba anogo süidaktsür DMST pangdak kubok melitetertem asoshi temerenshi tulu alitsü.

Sd/-  
T. Imlí Aier  
President

Sd/-  
Aküm Mozür  
General Secretary

## Papua New Guinea menoknok lendong nung nisung pongu süogo

**Port Moresby, Metsüremi/**

**March 25 (Agencies):** 6.9

magnitude tesashi ka agi Papua New Guinea anüolen kinük nung aliba tesem ka kongshiba sülen nisung ishika süogo aser ki 1000 shi raksatsüogo, ta ketcangsürtemi metedaktsü.

Iba menoknok yagi Deobar anepdang 6:20 meta linük yimtiba Port Moresby nungi km756 pilar aliba Ambunti jila anasa Sepik tesem kongshia liasü.

East Sepik Governor Allan Bird-i Facebook ajanga menoknok anokba sülen iba province nung tesem timba raksatsüogo, ta metedaktsü.

"Tejashitsüka nisung ishika süogo," ta pai ashiba den ketcangsürtemi menoknok ajanga teraksatsüba bener arutsüba asadangdar, saka tang tashi nung ki 1000 shi raksabobo jangjaogo, ta metedaktsü.

Taoba mapang osang ajanga lendong nung nisung asem asüba metedaktsü, ajisüaka provincial police commander Christopher Tamari-i Hombarnü AFP news agency dang, nisung pongu asüba mangaoka lir aser lendong nung asür timba akümtsü akok, kechiyong tekümzükba maparen maneni inyakdar, ta metedaktsü.

Linük kubok Sepik ayong kümshio nung aliba tesem ka 7.6 magnitude tesashi menoknok ka anoka nisung pezü tashi taküm samaba densema lir.

ano menoknok agi kongshio.

Noksa balala ajanga tzü agi metsünger aliba tesemtem nung azükitem chireper aliba sayuogo aser kasa mapang nung province yimtiba nung apu tejen ka kanga mejungi kümber aliba sayuogo.

Tzümetüsüng agi alinük km 800 dak tema metsünger lir, anungji iba ajanga Sepik ayong kümshio nung aliba yimtsüng 60 nungi 70 tsüngda kongshio," ta Bird-i Hombarnü Australian Broadcasting Corporation (ABC) dang ashi.

Bird-isa, nüburtem nem mozü, tajemtsü tzü aser khen atema jenoktsü atema tejenokdak agütsütsü kanga nüngdaka lir, ta ashi.

Papua New Guinea nung menoknok ya mapangshia anoker kechiyong iba linük ya "Ring of Fire" nung amenoka lir.

South Pacific asetkong linük Papua New Guinea ya Australia anüotkiplen lir aser taoba küm April ita menoknok tesashi anati iba linük kongshia liasü, kong 7.0 magnitude tesashi menoknok ka anoka nisung pezü tashi taküm samaba densema lir.

Maneni 2022 küm September ita-a iba asetkong kubok kinük nung aliba tesem ka 7.6 magnitude tesashi menoknok ka agi kongshio aser iba lendong nung nisung 21 süa liasü.

